



類函二十



卷四二帝王
四三帝王

4加3
427
21



冊 4 3
卷



新金圖書
此係八年明治
冊八月八日
月諸田一人
悼山同資
郎君釀
所購以贈



淵鑑類函卷四十二

帝王部三 帝王總裁

帝王總裁六 述尊號冊文 增即位冊文

原述後漢班固高祖述曰皇矣漢祖纂堯之緒實天之德聰明神武秦人不綱網漏於楚爰茲發迹斷蛇奮旅神母告符朱旗乃舉粵蹈秦郊嬰來稽首革命創制三章是紀應天順民五星同晷項氏叛援黜我巴漢西土宅心戰士憤怨乘釁而運席卷三秦割據河山保此懷民股肱蕭曹社稷是經爪牙信布腹心良平恭行天罰赫赫明明 又文帝述曰太宗穆穆允恭元默化民以

躬率下以德農不供貢罪不收孥宮不新館陵不崇墓
我德如風民應如草國富刑清登我漢道 又景帝述
曰孝景莅政諸侯方命尅我七國王室已定非怠非荒
務在農桑著於甲令民用寧康 又武帝述曰世宗魏
巍思弘祖業疇咨熙載髦俊並作恢我疆宇外傳四荒
武功既抗亦迪斯文憲章六學統一聖真封禪郊祀登
秩百神協力改正饗茲永年 又昭帝述曰孝昭幼冲
冢宰推忠燕蓋詩張實叡實聰罪人斯得邦家和同
又宣帝述曰中宗明明寅用刑名特舉博納聽斷惟精
柔遠能邇輝耀威靈不顯祖烈尚於有成 又元帝述

曰孝元翼翼高明柔克尊禮故老優游亮直外割禁囿
內損御服離宮不衛山林不邑奄尹之訾穢我明德
又成帝述曰孝成惶惶臨朝有光威儀之盛如珪如璋
壺闈恣趙朝政在王炎炎燎火亦允不揚 又平帝述
曰孝平不造新都作宰不伊不周喪我四海

原 漢傅毅明帝誄曰惟此永平其德不回恢廓鴻績
遐方是懷明明備肅四國順威赫赫盛漢功德巍巍躬
履聖德以臨萬國仁風弘惠雲布雨集武伏蚩尤文騰
孔墨下制九州上係皇極豐美中世垂華億載冠堯佩
舜踐履五代三雍既洽帝道繼備七經宣暢孔業淑著

明德慎罰尊上師傅薄刑厚賞惠慈仁恕明並日月無
有偏照辟如北辰與天同曜發號施令萬國震懼庠序
設陳禮樂宣布璿璣所建靡不奄有貢篚納賦如歸父
母正朔永昌冠帶僖耳四方共貫八極同軌 後漢蘇
順和帝誄曰天王祖登率土奄傷如何昊穹奪我聖皇
恩德累代乃作詞章其辭曰恭惟大行配天建德陶元
二化風流萬國立我蒸民宜此儀則厥初生民三五作
網載籍之盛著於虞唐恭惟大行爰同其光自昔何為
欽明允塞恭惟大行天覆地載無為而治冠斯往代往
代崎嶇諸夏擅命爰茲發號民樂其政奄有萬國臣民

咸秩大孝備矣闕宮有恤由昔姜嫄祖妣之室本支百
世神契惟一彌留不豫道揚末命勞謙有終實惟其性
衣不制新屏玉遠屏履和而行威稜上古洪澤滂流茂
化沾溥不憖少留民斯何怙獻歛成雲涕泣如雨昊天
不弔喪我慈父 崔瑗和帝誄曰元景寢曜雲物見徵
馮相考妖遂當帝躬三載四海遏密八音如喪考妣擗
踴號吟大隧既啓乃祖元宮永背神器升遐皇穹長夜
冥冥曷云其窮 魏曹植武帝誄曰於惟我王承運之
衰神武震發羣雄殄夷拯民於下登帝太微德美旦奭
功越彭韋九德光備萬國作師寢疾不興聖體長歸華

漢書卷四十二
夏飲淚黎庶含悲神翳功顯身沈名飛敢揚聖德表之
素旗乃作誅曰於穆我王冒稷胤周賢聖是紹元懿允
休先侯佐漢實惟平陽功成績著德昭二皇民以寧一
興詠有章我王承統天姿特生年在志學謀過老成奮
臂舊邦翻身上京表與我王兵交若神張陳背誓傲帝
虐民擁徒百萬虎視朔濱我王赫怒戎車列陳武卒虓
闕如雷如震欃槍北埽舉不浹辰紹遂奔北河朔是賓
振旅京室帝嘉厥庸乃位丞相總攝三公光受上爵君
臨魏邦九錫昭備大路火龍元監靈蔡探幽洞微下無
偽情姦不容非敦儉尚古不玩珠玉以身先下民以純

樸聖性嚴毅平脩清一惟善是嘉靡疎靡昵怒過雷霆
喜踰春日萬國肅虔望風震慄既總庶政兼覽儒林躬
著雅頌被之瑟琴茫茫四海我王康之微微漢嗣我王
匡之羣桀扇動我王服之喁喁黎庶我王育之光有天
下萬國作君虔奉本朝德美周文以寬克衆每征必舉
四夷賓服功踰聖武翼帝王世神武鷹揚左鉞右旄威
陵伊呂年踰耳順體愉忠肅乾乾庶事氣過方叔宜並
南嶽君國無窮如何不弔禍鍾聖躬棄離臣子背世長
終兆民號咷仰懇上穹既以約終令節不衰既即梓宮
躬御綴衣璽不存身唯縶是荷明器無飾陶素是嘉既

次西陵幽閨啓路羣臣奉迎我王安厝窈窕元宇三光
不入潛闈一扁尊靈永蟄聖上臨穴哀號靡及羣臣陪
臨佇立以泣去此昭昭於彼冥冥永棄兆民下君百靈
千代萬乘曷時復形 曹植文帝誄曰天震地駭崩山
隕霜陽精薄景五緯錯行哀殊喪考思慕過唐擗踴郊
野仰愬穹蒼考諸先紀尋之哲言生若浮寄德貴長傳
朝聞夕逝死志所存皇雖殮沒天祿永延何以述德表
之素旃何以詠功宣之管絃乃作誄曰元光幽昧道究
運遷乾迴曆數簡聖授賢乃眷大行屬以黎元龍飛踐
祚含契上元五行定紀改號革年明明赫赫受命自天

風偃物化德以禮宣詳惟聖質岐嶷幼齡研幾六典學
不過庭潛心無內抗志高明才秀藻朗如玉如瑩聽察
無響視覩未形其剛如金其勁如瓊如冰之潔如砥之
平爵功無重戮違無輕心鏡萬機鑒照下情宅土之中
率民以漸道義是圖弗營厥險六合通同齊契共檢導
下以純民由樸儉緋冕崇麗衛統惟新尊肅禮容瞻之
若神方牧妙舉欽於恤民虎將荷節鎮彼四鄰朱旗所
勦九壤披震疇克不若孰敢不臣懸旌海表萬里無塵
回回凱風祁祁甘雨稼惟歲豐登我稷黍家佩惠尹戶
蒙慈父在位七載九功仍舉將承太和繼跡三五宜作

物師長爲神主壽終金石等算東父如何奄忽摧身后
土俾我筑筑靡瞻靡顧嗟嗟皇穹胡寧忍予明鑒吉凶
體達存亡深垂典制申之嗣皇聖上虔奉是順是將乃
啓元宇基於首陽擬跡穀林追堯纂唐合山同阪不樹
不疆塗車芻靈珠玉靡藏百神警侍賓於幽堂於是候
大隧之致功陳元辰之淑禎潛華體於梓宮憑正殿於
居靈悼晏駕之既俟感容車之速征浮飛魂於輕霄就
黃墟以藏形背三光之昭晰歸窀穸之冥冥嗟一往之
不返痛悶闔之長扃 晉陸機吳大帝誄曰我皇明明
固天實生體和二合以察三精濯暉育慶懷祥載榮率

性而和因心則靈厥靈伊何克聖克仁茂對四象克配
乾坤齊明日月考祥鬼神誕自幼沖叡哲宿照甄化無
形探景絕曜巍巍聖姿文武既俊有覺德徽兆民欣順
將熙景命經營九圍登跡岱宗班瑞舊圻上元匪惠早
零聖暉神廬既考史臣獻貞龍輶啓殯霄載紫庭辰旒
飛藻凶旗舉銘崇華熠爍翠蓋繁纓千乘結駟萬騎重
營簫鼓振響和鸞流齊動軫闐闐永背承明顯步萬官
幽驅百靈隨化太素即宮杳冥億兆同慕泣血如零
潘岳世祖武皇帝誄曰粵若稽古帝皇誕受休命作我
晉室赫赫文皇配天並日大行龍飛創制改物湛恩汪

濼流澤洋溢上齊七政下綏萬邦四門穆穆五典克從
惟清緝熙於變時雍愛盡事親教加百姓于喪過哀在
祭致敬后蠶冕服躬藉粢盛六代畢奏九功咸詠行敦
醇樸思貫元妙莅政端位臨朝光曜胄子入學辟雍宗
禮國老恂恂貴遊濟濟莫孝匪子莫悌匪弟化自外明
訓法以禮獷彼吳楚稱亂三代世歷五僞年幾百載邊
垂虔劉王化阻闕羽檄星馳鉦鼓日戒帝御羣師奉辭
奮旅腹心庭爭爪牙疑沮天監獨照聖策乃舉朝服濟
江止戈曜武野無交兵役不淹月偕號歸命稽顙晉闕
邪界蠻流傍納百越表閭旌善德音爰發虞人獻箴周

書再誥酒懼其彝獸戒其冒于我大行縱心所好動不
踰矩性與道奧厭厭酣飲樂不辨顏桓桓振旅田無遊
盤我德如風民應如蘭靡不夙夜無敢晏安務農望歲
時或不稔小心翼翼恤民以甚御坐不怡撤膳賑廩西
流垂精南金抑施永言孝思天經地義問誰贊事英彥
髦士問誰翼侍博物君子潛明神鑒從衆屈己道濟羣
生爲而不恃先天弗違後天降時萬物熙熙懷而慕思
顯顯縉紳不謀同辭巖巖岱宗想望翠旗恭惟大行功
成不居議寢封禪心栖沖虛策告不足太平有餘七十
二君方之茂如思樂天德等壽嵩華如何寢疾背世登

遐遷幸梓宮孤我邦家龜筮既襲吉日惟良永指太極
寧神峻陽羣后擗踴長訣輶輅聖靈斯顧豈伊不傷家
無遠邇邦靡小大四海供職同軌畢會茫茫原野亭亭
素蓋縞輅解駕白虎弭旆龍輜即定元闈載扃如天斯
崩如地斯傾哀哀庶寮煢煢自愍彼蒼者天胡寧斯忍
聖君不返我獨旋軫 宋謝靈運武帝誄曰九有同悲
四海等哀矧伊下臣思戀徘徊敢遵前典式述聖徽乃
作誄曰舜潛歷巖高晦泗渚龍德而隱風積乃舉皇之
遜世屯難方阻眷此區寰閉爾淪胥太乙之季權戚攜
薄隆安之初主相蒙弱岳牧糾虔朝廷紛錯妖橫乘陳

蛟噴鯨躍旣擾輿區遂斥帝屢亂離斯瘼不後不先寔
賴明哲授手康旃紀度迴薄餘分成閏舊晉中微僞楚
藉釁躡彼潛機整此英陳推亡必朽固存斯振盧循負
險肆慝遐嶺殄我江豫迫我臺省民旣搖蕩國將遷鼎
乘騶歸轅式固皇境弘危濟險弭難釋殆虎騎騫隰舟
師漲海傾穴尋窠窮幽測昧昔去洛汭息肩江沚世更
十君年踰百祀國絕興復家成桑梓荒默莫恤頽國誰
恥夏典載禹九道是行商詔述湯兼攻是并勤彼周流
協此經營仗鉞伐鼓赫赫明明乃救衆師竟執戎昭誨
以三略惠以六韜雲撤周京席卷秦郊復禮前塋雪愧

洪鑑卷四十一
舊朝既清西關復旋東道中憩徐豫兼應燕趙業盛曩
代惠侔大造澤及四海功格八表悠悠聲教縣縣川陸
北獻羶裘南貢金竹鬘首冠弁穿胸斂服寒穴欣日巢
栖玩屐匪惟遐譚靈物偕就孰是人事自天所祐甘露
芝草祥雲瑞宿嘉禾連木素鳥皓獸昔之所感謳頌同
音今之所應幽顯一心宋克虞德晉猶唐欽曰總八絃
于茲三齡四維開張九流昭明敦儉務素欽賢愛萌制
規作訓闡校脩經禮樂已甄雲雨未弘將陟井陘薄埽
白登北朔渴望飛旌衡軻東岱靈遲玉牒金滕天地不
仁蒼生寡福已荷一遇棄我何速梁顛木頽甘殞已贖

同軌畢至率土咸哀殊方均服樂樂素縗灑淚成雨響
叶如雷史臣考卜高山開基貞龜無遠遷靈有期嗣皇
擗標羣后崩悲孰云不戚痛百在茲惟徂之夕流火始
變秋月未永飛漏急箭鳴簫哀噉金觴虛奠列駕長隧
發輦華殿華殿既謝長隧是幸雙蓋躊躇六閑引領攀
援容貌眷戀俄頃哀哀百僚長辭含鯁奉教百朝執鞭
王始從履五牧年歷十祀天光下濟謬蒙眷齒愧微刀
筆頗預遊止垂幕侍講接筵餐理脩曙朗夕登臺泛沼
匪月匪日無晏無早如何一日緬邈穹昊微容未遠聖
靈超然收淚即路含戚何言風霜蕭瑟山海蒼茫地苦

情矜節速心傷孰是幽哀實戀我皇情思如環萱蘇豈忘

增即位冊文唐賈曾元宗即位冊文曰朕以寡昧虔奉鴻休本殊王季之賢早達延州之節昔者聖曆已讓皇嗣之尊暨至神龍終辭大弟之授豈惟衣冠所覩抑以兆庶咸知頃屬國步未夷時艱主幼大業有綴旒之懼寶位深墜地之憂議迫公卿遂同契象日慎一日以至於今一紀之勞勤亦至矣萬邦之俗化漸行矣將成夙願脫屣寰區昔堯之禪舜惟能是與舜以命禹匪私其親神器之重允歸公授皇太子某有大功於天地定阡

危於社稷温文既習聖敬日躋委之監撫已移年歲時政益明庶工惟序朕之知子庶不負時曆數在躬宜陟元后朕方比跡洪古希風太皇神與化遊思與道合無為無事豈不美歟王公百寮宜識朕意 賈至肅宗即位冊文曰咨爾元子某惟天為大惟人君則之順乃德故舜禹揖讓而履皇極弗乃道故丹朱商均不能保鴻業是以啓有惠迪而夏嗣焉隋有亂紀而唐受焉五聖之御極皆以勤儉兢業日慎一日故能享祚長久垂慶無窮泊予六葉恭位四紀厭於倦勤緬慕汾陽當保靜怡神思我烈祖元素之道是用命爾元子當位嗣統於

戲爾有忠孝之誠極於君父爾有友愛之義信於兄弟
爾有仁恕之行通於神明爾有戡難之才彰於兆庶予
懋乃懿績嘉乃神武天之曆數在爾躬汝惟推誠禍亂
將冀爾而能清爾惟從諫社稷將冀爾而復寧佞言惟
疵直言惟師任賢勿貳去邪勿疑民非后孰理后非賢
罔與守邦欽哉慎乃有位無忝我祖宗之不烈矣 德
宗即位冊文闕撰人姓名曰昊天有命皇王受之立嫡以賢
春秋之義傳歸於子漢氏成規宗廟社稷實賴其慶咨
爾皇太子迺稟天地之仁合日月之耀道光三善孝著
十倫頃者國步多艱委以戎律理軍靖難保泰定功克

復帝圖廓清妖孽既表建侯之業俾承守器之重仁孝
之德夙夜惟寅朕天命有終弗興弗寤非至公無以主
天下非至法無以臨四海是用命汝陟於元后嗣守皇
業上繼宗祧下安羣望於戲宜遵太宗之法度肅宗之
儉約任賢勿貳去邪勿疑與眾守邦祇敬予訓 文宗
即位冊文闕撰人姓名曰大行皇帝睿哲英能對天明命方
夏底績夷蠻貢庭罔有不端太康有截宜荷九廟之重
永享億年之祿豈虞奸妖竊發矯專神器蠱惑中外扇
誘羣朋駭動神人毒深梟獍咨爾江王某聰姿孕粹清
明毓和智算機關元謀電發躬率義勇大清况徒且膺

當璧之符爰據枕戈之憤旣殲巨害當享豐福是用命
爾陟於元后永惟高祖太宗之翦定隋亂元宗之浸漬
利澤憲宗之堅除蠹孽艱難險阻最乃負荷小心以事
上帝儉德以刑家邦懋于令聞持久如始敬之休哉
增尊號冊文唐李嶠上應天神龍皇帝冊文曰爰自厥
初肇興司牧皇矣撫極蒸哉察道莫不因時適變改物
殊徽推五運而陟崇高步三微而膺曆數天地人皇之
立始別洪荒唐虞夏帝之君漸詳文質姬水以椎輪發
號烈山以斲耒增名然後仁被德宣功昭業遠歷訪前
古茲爲舊式我大唐受乾坤之睠命當寓縣之謳歌奄

有黎蒸遂荒宸象陛下垂統御錄截海披圖承四葉之
休光握三靈之寶契虞舜蒸蒸之德永錫羣方周文翼
翼之心其凝庶績驅齊民於仁壽致雅俗於醇濃六府
咸脩五兵不用航海梯山之客奉贄輸琛畊田鑿井之
夫擊壤鼓腹中外靜謐表裏雍熙而孽子滔天亂臣干
紀謀同觸瑟禍劇弄兵不虞之災忽生於肘腋無象之
鑿獨憤於神祇於時凶豎逼樓聖君憑檻威靈下濟覺
封豕之周惶醜逆上瞻見神龍之傳翼寶仗以億千之
衛天威成丈六之容衆瑞俱臨羣祲大駭盡迷方而失
據咸喪氣而亡精顧盼而斬馘舉屍指揮而冰銷霧廓

雖復草爲兵甲秦師驚蔣帝之神樹作幡幢釋主麾魔
王之衆虵軀之變媧后蛟影之隨漢高未足以匹此奇
徵方斯偉應自非冥符幽贊睿感潛通何以承波若之
護持享高明之福助昔者伏牛之主是曰犧皇名鳥之
君仍題鳳紀法身用馬鳴成道上士以龍德爲仙敢託
元符爰咨故實謹上尊號曰應天神龍皇帝鴻猷載肇
昌曆惟新庶以仰順乾心俯從人欲天長地久更隆四
大之尊名玉振金聲恒爲百王之稱首盛矣美矣皇哉
唐哉 李德裕會昌二年上武宗尊號冊文曰巨唐受
命繼體承業理運將至大君以興昊穹所以開至聖也

向者明兩未定帝華不協舍肩傳聖深惟至公先后所
以昭天命也亦猶堯發於唐侯文興於代邸神明之祚
不其難哉陛下清明溥鬯光耿四海元德真鄰天休大
賚日角見表氣志如神爰初定命正心理物如辰居其
極而天下無邪矣由是昭德塞違尊賢遠佞禹不自滿
成不敢康自閏壽以施王教由家道而刑國風去比周
覆名實攬權綱祗聖律脩舊典協成質抗嘉壇款太一
進正臣以端禮故老以求讜言遠無蔽獄近無留
令祈元祖而膏雨降祀靈岳而嘉穀登省刑罰而蓬宇
清發倉廩而冬蟊螟息去歲龍旂承祀大輅親郊捧玉瓚

而一獻光靈來格振金石而六變魄寶昭臨然猶古訓
是學緝熙於道天文炳煥雲漢其章溫恭敬遜承太任
之教和樂愷悌洽戚藩之心德風偃於羣黎威震重乎
絕域又以敬養不逮於長樂昭配未昇於禰宮每懷嗣
徽蒸蒸而慕所以奉若慈訓對越兩儀因心立志永錫
其教寘厝之罪興惻隱之仁迴霜收電爲之反汗及
單于慕義景附朔邊耀德戢兵謙臨是受至於備文物
展國容莫不先甲而布甘澤丁辰而廓陰翳斯所謂神
祇之心應矣天人之際交矣於是服冕之士戴鷩之倫
暨藩衛邦伯黃髮鮐背不謀而進曰陛下元默天晬輝

光日新大矣孝熙四極爰臻誠宜玉版溫潤鏤鴻明之
德神寶焜耀薦億萬之年丕天大典不可辭也陛下猶
謙退固拒至於三四羣臣不已乃曰俞哉夫徧覆包含
之謂仁極深研幾之謂聖憲度著明之謂文蠻夷震懼
之謂武感而遂通之謂神無思不服之謂孝臣等謹奉
冊寶上尊號曰仁聖文武至神大孝皇帝伏惟陛下乾
健不息謙尊而光壽乃侔於殷宗德乃厚於成康貽燕
後昆受福無疆 李德裕會昌五年上武宗尊號冊文
曰臣聞昔在周宣徽狃內侵四牡薄伐以定王國焉則
詩人大其功暨於漢宣北夷乖亂呼韓慕義郅支遠遁

則簡策著其美惟此二代稱爲中興伏惟皇帝表應龍
翼位合乾剛神全而正氣凝宇定而天光發智燭千里
動必察微心鏡萬機物來斯應於是五材用四維張建
中和之極舉前聖之綱重樞機脩法制斥背公之黨退
好逕之人內嚴體貌增堂陛之峻外絕締交抑輔車之
勢古所謂受命於天惟順獨正也又曰一心定而萬物
服惟陛下得之曩者北夷矜功耗蠹中國倒懸不解百
有餘年旣而龍祠堙滅攜國款塞有狼顧平城之心鯨
吞咸洛之志爰命驍將塞旗刈旃兵鏖穹廬火烈荆棘
故名王結髮冠帶入臣堅昆稽首鞮譯來獻而又奸臣

放命一紀陸梁據太行之固下窺洛邑通故絳之道旁
睨近闕肆其遺孽以竊兵柄議者僉曰精甲十萬積穀
十年泉魚不察湯網宜懸陛下雄斷霆聲羣疑冰釋揚
清風以埽雲鼓迅雷以破山任馮異則拔天井而震上
黨仗吳漢則發突騎而傾邯鄲壺關失險山東奪魄屬
有成邊叛將竊發參墟人心搖蕩異議放肆陛下臨朝
而言曰二寇獲罪於天子所不舍未三旬而定晉陽纔
斯年而滅路子不以金購豨將多降不勞師克粵首馳
報非至德感物孰能臻於此乎由是台宰百辟藩屏將
帥上言曰成伐東夷而肅慎來賀景翦七國而王室乃

安莫不始於武功終致刑措將以禋上帝薦祖宗宜受
鴻名以答元貺 宋范質上太祖尊號冊文曰惟天爲
大惟堯則之又曰舜有天下無爲而理是以古之言道
德者莫先於二帝一則曰聰明文思一則曰溫恭濬哲
英聲茂實意無欲而自彰景福鴻休心無求而自至魏
巍蕩蕩無得而稱伏惟陛下高明博厚宣慈惠和純粹
之德全孝友之行著惟精惟一知微知章向者龍尚處
於潛淵日未離於暘谷歷試之際志在扶危險阻艱難
何往不濟躍馬蹈高平之陣麾戈佐淮甸之征喋血鏖
兵一月三捷勞旋飲至論功莫二洎乎天監厥德用集

大命人祇叶應風雨咸若鼎運初建國步猶梗始則李
筠犯順長戟指闕并人連禍寇我北鄙於是有太行之
行重進怙亂棄德崇姦幅員千里生民被毒於是有廣
陵之役千乘萬騎如霆如雷詢彼仇方震疊區宇翠華
宵至豎城旦下連平二孽有同符契累朝已來出師誅
暴未有若此之奇速也頃者華風不競中國政微五嶺
三江置諸度外殊文異軌六紀于茲肇啓聖謀驅攘寇
亂荆湖底定南土晏然燕薊之戎汾晉之孽燕巢幕上
朝不謀夕邊事少間理道無壅嚴恭寅畏一日萬機動
於已而泰於人儉於躬而豐於物明四目而高視達四

鴻臚奏疏卷四十一
聰而遠聽不侮鰥寡恤天窮也信及豚魚遂物性也惜力念耕耘之苦推食閔介冑之勞法家之流既峻且密乃詔大理重正刑名俾盡哀矜務從寬簡減盜竊之罪緩鹽麴之禁好生之德通於神明若乃味爽丕顯坐而待旦商湯之戒慎也側身損己長轡遠馭漢文之化導也循名責實信賞必罰建武之法制也果敢決斷從善如流貞觀之風烈也帝王之道於茲備矣太平之業於茲成矣於是祇見清廟致其孝享圓丘展禮對越上元一獻而天帝降祉再獻而神人以和三獻而萬祿攸報祥風拂袂休氣繞壇熙熙怡怡羣心胥悅國家大慶衆

庶共之肆赦覃恩俾民更始與天道合謂之應天天無不覆謂之廣遠無不至謂之運博施濟衆謂之仁智周萬物謂之聖化成天下謂之文保大定功謂之武其德無際謂之至德臣等上尊號曰應天廣運仁聖文武至德皇帝伏惟垂日月之明監億兆之情凝旒端委昭受鴻名如山嶽之固如松柏之貞乾健不息品物咸亨承天之祐萬壽千齡 王珪上仁宗徽號冊文曰孝孫嗣皇帝臣謹再拜稽首言曰臣伏觀古先哲王莫不大名發於前而大惠昭於後其法皆本於至公而不可易至後世臣子又欲盡報上之道以謂君德甚盛其言不足

以包衆美於是有至郊加誅之文夫欲推事存之禮述
追遠之志則奉素享之榮號益新紀之鴻烈謀羣公請
太室洋洋乎際天接地而震顯之不亦當靈心而傳古
誼乎恭惟仁宗皇帝躬清明之資賦神睿之略乾行施
之不息仁性根於自然時乘六飛端御大器知窮八荒
而不見其迹澤及萬彙而不居其功爾乃簡拔峻賢放
遠邪佞宥恕刑獄懷保鰥寡賞不徇所私罰必當於理
興農桑之本務緝禮樂之墜文有憐怛好生之心吏或
誤入重辟必終身見斥有寬裕從諫之度言者屢進狂
直必曲意見容念兵革之傷夷則不殺而服念稼穡之

勤勞則罔寧於勉矧履天下之尊而持之以抑畏饗天
下之富而寶之以儉素加以夙夜齋栗事天之誠盡霜
露怵惕念親之感深方朝廷之久安迺大革因循而聖
政又新爲社稷之重計迺前定禍亂而皇嗣蚤立故四
十二年仁恩川流涵濡薰蒸格於上下日月華風雨均
四時和百穀蕃蟲魚遂性自安川藪之游男女潔誠更
趨耕織之樂固有幽遐荒昧之俗不約而子來奇偉倜
儻之瑞不劫而特見者矣丕赫哉憲度鴻明聲文沛施
自載籍之傳蓋未有休功盛業可加於茲也 元王構
上太祖徽號冊文曰伏以恢皇綱廓帝絃建萬世無疆

之業鋪宏休揚偉績遵累朝已定之規式當繼統之元
蓋有稱天之誅孝弗忘於率履制庸謹於加崇欽惟太
祖淵量聖姿睿謀雄斷沛仁恩而濟屯厄振羈策以馭
豪英惟解衣推食於初年見君國子民之大略元符顯
握諸部悉平黃鉞載麾百城隨下裔土兼收於夏孽餘
波克殄於金源蕩蕩乎無能名迹遠追於湯武灝灝爾
其爲訓道允協於唐虞根深峻嶽而維者四焉囊括殊
封而統之一也肆予小子承此丕基兩祗見於太宮恒
儻臨於端扆祚垂鴻兮錫裕尚期昭報之申牒鏤玉以
增輝敢緩彌文之舉 姚燧上仁宗尊號冊文曰昔我

世祖既平炎趙質之於書幅員廣長振古無倫覆燾之
下八紘萬國莫敢不庭何獨一主西北岸然憑道阻脩
方命正朔德綏之而不摯威董之而不讐夫豈不能聲
罪致罰深入其地終以聖人親其宗親包荒有年成宗
繼序久憤驚頑天鑒昭明於裕皇孫獨異陛下授以太
祖皇帝信寶撫軍漠北時未及冠承命即行其視萬里
莽闐寒冽之鄉不遠不難如堂適庭至則獎厲諸軍脩
明法志簡拔果毅均苦分勞解衣燠寒推食飲饑洗洗
汔汔士氣日作睿算伐謀待寇歲至奪人以先身踐戎
行霆馳電擊大北其羣虛已不矜日慎一日始終十年

不狙屢勝狂狡不懲悉銳來加當以選鋒用間出奇盡
襲輜重彷彿無歸度不能軍耄倪纍纍降口百萬致茲
救寧平四十年未靖之梗成兩祖宗未究之志天下之
人聞其風聲思覩天光者顛顛翹翹九圍一心握是乾
符歸正宸極弛武事之夙習洽新化以文治立愛自親
曾未旬浹上尊太后問安以時下建儲宮庶政是先又
舉列聖未遑之典欽崇元祀玉瓚黃流薦裸太室還蹕
龍興徘徊太祖龍旂九旂斲金于斯肇基帝業為城中
都又以孔子垂範百王將二千年而顯謚未稱加大成
於至聖文宣王上立勞於軍與凡庭臣悉大賚之間歲

不登既賑既恤虞施未博民罹罪罟再肆大宥至德難
名赫赫巍巍惟天為大挂一漏萬井觀如斯求可盡臣
下歸美報上者惟是徽稱謹上尊號曰統天繼聖欽文
英武大章孝皇帝立心天地立極生民茂對鴻名于億
萬年

淵鑑類函卷四十二

洪鐘集卷四十三
龍輜以長叫痛靈暉之潛逝其辭曰欽惟皇考體道之
真德侔乾坤齊曜三辰應期登禪協于天人上虔郊祀
下惠兆民憲章唐虞允得其津搜揚側陋故老是賓百
揆時序盛業日新恩從雲翔威猶霆震江海靜波岷岳
無塵四夸率服莫不來臣肅慎奉貢越裳効珍化此弊
俗歸之至淳昔在上聖咸享百年哀哀皇考用不是臻
邁厲彌侵景命殞顛舍此昭晰即彼幽元仰瞻靡怙廓
若無天終制尚儉率由典度華幕弗陳器必陶素不封
不樹所在惟固貽法來世是則是慕大隧既啓吉日將
征鐘鼓雷震白虎抗旌龍螭驤首良駟悲鳴倡者振鐸

輓夫齊聲背此崇殿將適下庭元宮窈窕修夜冥冥光
燈永戢幽闈長扃仰訴皇穹零淚屏營云誰能忍寄之
我情結心墳隴永憑聖靈 又郭璞元帝哀策文曰永
惟殿宇之廓寂悲彝奠之莫歆感鸞輅之晏駕哀袞袞
之委衿痛聖躬之遐往長淪景於太陰乃作策曰王之
不極百六作艱鴟集瓊林鯨躍神淵懷愍失據海覆岳
顛蠢蠢六合罔不倒懸靈慶有底見龍在田誰其極哉
我后先天大人承運重明繼作撫征淮海駿命再廓仁
風旁靡神化潛鑠處沖思挹居簡行約聖敬日邁元心
逾漠用物與能總攬羣略林無滯才山無遺錯恩靡不

懷化靡不被茫茫海域款塞慕義萬里同塵罔匪王隸
熙熙遺黎莫知其寄括終宇宙混同天地曰功永年曰
德慶隆奈何氛厲奄集聖躬大業未恢皇齡未中天慴
其景崑頽其崇煢煢小子藐藐孤沖靡天何戴靡地何
憑恍惚極慕若存若終蔑焉無聞廓焉長寂聆音靡晞
瞻顏失覲窮號曷訴叩心誰告何悲之哀何痛之酷嗚
呼我皇逢天之戚嗚呼哀哉眇然升遐即安元室煌煌
火龍赫赫朱鞞終焉永潛曷其有出明訓長絕小子何
述望阜增歔臨崩慟慄哀兼陟方痛過過密靈爽安之
反真復質永合元漠終始得一

又關撰人姓名成帝哀策

文曰宸極寥廓聖靈遐之哀備物之虛在痛永往之無
期乃命史官述德寄辭其辭曰五德代興素靈啓曜離
光疊耀三辰重照明明我皇含貞挺妙元秀夙達履德
罔違鳳樓遐邈神宇凝夸文明外潤仁簡內綏舉無遺
中鑿無幽微運隆汾陽道侔垂拱靜恭清穆冥功日用
亶亶神軌固天攸縱爰在陽九皇綱中替姦豎肆逆牢
羅失衛升降艱難協應神契靈祚旣保顯揚天命雰霧
朝晞兩儀開鏡訓詔阿衡虛已納正九功潛流七德將
表方振宏羅稜威電埽芟蕩神衢一我王道昊天不弔
降茲大悔天傾其儀地覆其載大業未究神爽遷背哀

貫三靈痛流萬代爰初不豫大漸在躬啓手歸全神氣
夸冲疑哉達識體正履終袞龍既襲玉容斯幽登醪虛
設觴爵靡酬墳牘莫啓聖跡誰修冥冥我皇神焉何遊
撫膺遐叫迸涕交流三筮告期將歸陵墟陞殞羽翼庭
納龍輿玉輪動運錫鸞鳴衢錫旆徘徊六驥踟躕輕雲
蔭軌流風翼車哀哀同軌唯唯輓夫長號永慕泣涕連
洳大塊獨運終歸其始我后永往寧神千祀悠悠上天
煢煢惟已眇然靡憑廓焉無恃目範令儀徽音在耳
又闕人姓名康帝哀策文曰感廣廈之空寂悲俎奠之虛
陳痛皇神之邈遠哀靈景之長泯仰瞻宸極俯憑鸞軒

五情摧裂號慟煩寃遂命國史述德銘勲事以言顯功
以名存其辭曰招拒降靈篤生我皇岐嶷妙哲幼有珪
璋含貞發曜蘭風載芳厥初肇建宗國是肩祇承師友
執心淑慎徽猷愷悌金質玉潤固天所啓應茲靈運入
繼皇祚龍騰鳳迅因假任物惟精委順穆穆我皇風流
凝廣聰鑒遐照思心內朗應變無方從善如響矩儀可
慮法物可象覆燾羣生靡物不養如何一旦神遊靈爽
仰攀擗踴觸物感想卜吉有期將即元冥太常既建千
乘列庭皓皓輿服翩翩素旌笳簫寥唌輓夫齊聲六驥
躊躇蕭蕭悲鳴是用增哀雨泣沾纓痛貫五內哀切三

情道隆名貴德享彌光灼灼皇猷終焉允臧垂美兆祀
芳風休揚 又闕撰人姓名 穆帝哀策文曰欽明文思允恭
克讓忽若布衣忘其矜尚體有示無德克神王冕旒兩
楹委政元輔內倚公旦外仗尚父郁哉惟文赫斯惟武
西廓岷河北清伊渚園陵聿修舊京式敘方振長彗風
掃天宇休牛歸馬卷旗臥鼓俾我烝民擊壤容與昊天
不弔奄背率上哀同過密痛方割鉅日月不居神道之
幽三辰吉良五謀同休祖載華庭晏駕崇丘俯執饋奠
仰攀龍輶爰爨黼翬飄飄素旒感想平昔人懷崩抽號
聲如震洒涕成流 又闕撰人姓名 簡文帝哀策文曰同軌

畢至內外成列素旗宿懸輻輳首轍執祖行於前殿奉
靈輿而遷逝悲神宇之長違痛聖儀之幽翳攀龍輶以
號慕撫素膺以泣血爰命史臣敘述聖德揚徽音於飛
旌寫哀心於翰墨乃作策曰淳曜發暉皇曆攸膺聖祖
啓運哲王遐承烝哉元后光我中興天基徒構朝陽再
升皇矣聖考合一履中道心元元文明內融湛湛神儀
穆穆靈風望之凝秀即之深冲爰在初齡至性自然水
鏡一世室堂重元愔愔素庭翳若丘園遂阿王室婉跡
經綸時有汗隆道無屈伸如彼平流泯矣其津大過之
時皇德不競天人革心謳謠徒詠時惟伊霍輔運以政

欽若昊天祇此明命龍飛九五饗茲萬國居宗舉契允
恭元默綢繆哲輔虛已仗德大明方曜離暉翳朗元化
誰陶蒼生曷仰四運忽其遙邁日月飄以飛沈將寧神
於元宇遷玉輅於中林背華殿之昭晰即幽隧之重深
奉神櫬以永訣邈終天而莫尋神恍惚其若寄泣橫墜
以流襟 又王珣孝武帝哀策文曰同軌畢至百司胥
亞法物夕陳輻輳夙駕親執饋奠長號永夜懼鼓刻之
湔盡哀良辰之莫借悲宮宇之寥廓痛聖儀之幽化夫
至德無名固理絕稱謂然祝史陳辭亦臣子所貴寄窮
情於翰墨庶遺塵之髣髴辭曰惟皇作極五德迭運康

實復夏武亦隆晉疊疊太宗希夸其韻鏡之者元撫之
者順於穆皇考嗣徽絕軌前聖後哲契合一揆心去其
伐行遺其美廢華任誠捨筌存旨惟深通志羣方咸秩
惟幾成務能事斯畢未若我皇至則不疾恢恢天網疎
而莫失居有以虛宰多以少簡則可從易則不擾信及
豚魚澤被億兆湛然司契坐一八表園陵既衛威靈赫
赫子來既構寢廟奕奕武曰止戈戎不及役文教聿脩
有恥且格跡有遠邇感無高深道之所被改色革音皓
獸馴苑素羽棲林殊柯連理異蒂同根方融元液陶鑄
斯民雲韶候奏比屋思淳積祐莫應天罰奄臻太山頽

構洪瀆竭津何殃之甚何酷之殷自罹閔凶二氣代變
霜繁廣除風迴高殿帷幙空張肴俎虛薦極聽無聞詳
視罔見人神道殊吉凶有禮龜筮參謀埏隧告啓史臣
考古警者在陞攀援忪惟兄及弟龍輿肅以引邁前
驪紛以抗旒城闕儼以整列馳道亘以通修感平昔之
所幸豈斯路之復由輓哀唱以翼衡駟悲鳴而顧軒違
華宇之晰晰即永夜之悠悠奉靈櫬而長訣緬終天而
莫收訴穹蒼以叫踊洞五內其若抽儻性命之可贖甘
人百於山丘茫茫大運靡始不終哲王遺世貴在道融
昭哉我皇萬代流風良史式述德音永隆 宋謝莊孝

武帝哀策文曰應門洞望馳道南除敢塗已撤鬱壘將
虛哀子嗣皇帝擗標池綽周遑旌軫攀七緯之崩淪慟
三靈之徂盡百神慕而行雲沈萬國哀而素霜賈衣冠
緬邈弓劒不追敢緝謳頌髣髴希夸其辭曰樞電皇根
月瑤國緒裔裔丹陵蟬聯華渚二后在天大行纂武克
睿克聖重規襲矩昭昭金式明明玉溫望雲其遠就日
其尊雨零露湛冬暖春暄聲芳納麓道昭賓門上德無
稱至功不器怙悵四始優游六位綴響蘭深緝言瓊秘
悠哉梁踐眇焉汾肆敬業開寓離經作翰鴻起荆河鸞
遊楚漢泗濱霽明江區承負陝左清郊棠陰虛館地維

不紐乾剛弛機義庭薄蝕紫路流飛泣血派涖顧瞻川
沂孝貫樞極義震寰圍誓鉞皇郊詔師牧甸七景締華
五雲卷煽雪怨園邑婦恥瀛縣啓聖宸蓋集寶龍見王
室多故國步方蹇淮濟裂冠江荆毀冕東楚亂常西華
汨典動算揮圖爰戡爰翦浹宙斯澄縣區咸鏡脩風曉
逸德星夕映溽露飛甘舒雲結慶禎彼動植信泊翔泳
缺禮克宣墜章必構方堂饗極圓流肆胄南聳郊宮北
清靈囿瑤軒春藉翠華冬衍經緯窮文克定盡武鄙上
呈祥介丘載佇在盈念冗成功弗處榮鏡中世鳥奕前
古睿業初遠鴻化方亭丹雲承日素景騰星玉几去襲

綴衣在庭辭重陽之昭昭降大夜之冥冥氣買炎涼史
詔龜筮文物空嚴鑿和虛衛動蜃輅之逶迤顧璧羽之
容裔出國門分天地向幽途異身世龍旌鬱而青槐遠
驚葭亂而白楊翳觀初霜之變條聽秋風之下蒂橋山
緮雲穀林虧日輦道結寒松庭盡密芝蓋迫軫上驥眷
轡萬寓肅其北轆靈阿開其深隘南維有時傾離光不
長鏡騰英聲於茂實方流華於舞詠 齊王儉高帝哀
策文曰降階執禮泣血纏心感客臺之罷御哀恭館之
不臨仰神儀而邈絕視區物而悽陰俾茲良史敬脩舊
則敢圖鴻規式揚至德其辭曰靈源遙裔肇惟商丘聖

躬寧夏賢識歸周我皇踵武超冠前猷英風允迪德音
孔脩月准敷仁日精表孝則地均和體天合照外弘三
至內隆七教水祀將傾乾維晦象章弁長襲鼓磬屬響
聲化已淪政刑遂往國圖靡緝民規載爽康世以德揆
亂資武威以雷霆潤以風雨六術允昭四義克舉自東
徂北遐方即敘功被河濟化隆江漢帝謨仰式王維佇
幹改步藩屏來登翼贊綢繆總章因循陽館昔在保衡
君違斯正爰茲博陸亦鑿靈命放昏以忠登明資敬義
煥金石功昭舞詠蠢爾荆漢悖亂人經謀連樞禁兵接
神垆禦奸以德禦宄以刑獻捷宗寢飲至王庭政教雲

行徽猷天造山鑑紫璇苑茂朱草玉檢騰暉金繩薦寶
天鏡旣穆地維旣肅遐邇壹體表裏禔福乃眷斯民味
旦杼軸興文偃武纘禹舊服所尚惟簡所保惟賢居尊
彌約無善不延膠序載緝風軌克宣上洞清儀下達元
泉聽覽閑日應物餘景怡慮以文棲心以靜鴻章晨映
徽言夕永迹庇區服情深箕穎萬寓餐和百神受職梁
甫欣儀云亭望式輔德伊何奄捐民極嵩岳長傾宸暉
斯是機照惟寂達鑒靡傷慎終敬始知微知彰立言垂
範玉潤金相瞻仰遺式哀結流霜旋玉軌之皦鏡動雲
旗之透迤振哀笳於八極響清蹕於咸池顧應掖而稍

遠視機衡而長離風遲遲而懷暮日憺憺其若垂感衣
冠於喬岳追弓劍之在斯悼丁年之薄祐訴窮心於兩
儀 梁沈約齊明帝哀策文曰龍鼓旣撤備物已陳殯
宮無夜夕燎終晨號環輶幄攀標應路容衛弗改軒檻
如故望東川而不追仰昊天而自訴列聖同軌謚法樹
聲芳詔掌牘式播遺英其辭曰五曜在天遞作民主赫
矣帝高蒸哉嗣武多難固業殷憂啓聖時惟我皇功符
受命爰始濡足坐運機深鵬逝風舉龍動雲陰之郢南
泝即豫西臨體茲大德懷此小心賓於四門四門穆穆
納於百揆百揆肅肅德浸董茶仁被比屋何遠何邇無

思不服嗣君喪道不式典謨神器業業事等瞻烏民懷
奧主后來其蘇皇天眷命授以籙圖臨朝凝睟昧旦不
顯斟酌前王擇其令典不言斯應不行斯踐露臺靡營
離宮弗宴眷言膠塾弘啓上庠軌儀四代祖述三王德
暉內動英華外揚禮行罇俎義及幽荒仰庶天德降年
永久北極齊光南山獻壽滄溟奄竭嵩岱皆朽沴非昊
穹惟余之咎攀龍詎幾大隧元元厭世崇陸即宮下泉
殯階已遽素幕高褰端闈洞啓屢緜徐前肯朱闕以南
轉乘翠龍而東度經原野之荒涼屬西成之云暮伐金
鼓以清道揚悲笳而啓路極厚地而不追終蒼天而永

慕蒼梧晦遠昏微不泯紀事寂寞龜書可循哲王違世
克播遺塵倚歎萬古暉光日新 北齊邢子才文宣帝
哀策文曰皇路啓扉輜菟殫八校案部六卿且引攀
蜃輅而雨泣仰穹蒼而撫心悲風發而馳駭愁雲興而
景沈哲王垂範有訓有則式奉語言光敷令德其辭曰
四象更運九天代名通三以王得一爲貞是應元德實
啓蒼精風后之陳師尚之兵三奇六合七變五成授戈
推轂稟律襲行野無完陳邑少堅城經營四海勛勞百
姓芝蓋夕臨羽旄晨映地不掩瑞天不愛寶旣丹其雀
又朱其草莫黑已素莫赤自皓百獸斯蹈五靈載擾甘

露灑灑青龍矯矯武功已暢文教未窮方偃烽埃銷戟
藏弓齊光日月比祚華嵩而氛祲日下星闈虛中奄捐
朝市長棄華戎道宣末命義闡餘風六綽已散九旗方
卷見容衛之虛歸知平生之日遠同乘雲而永逝異騎
龍之更反清笳奏兮野風急金鼓震兮日光晚千官悲
而雨注萬國哀而露泣萬事同盡百慮俱收劒舄永去
衣冠自遊音儀已謝神教空留知英聲與至德當無絕
兮千秋 陳沈炯武帝哀策文曰望三靈而標目躋九
地而崩心哭仍几之將撤慟祖塋之虛斟黃屋祲而白
日掩紫極涵而浮雲陰其辭曰悠悠媿水鬱鬱姚墟惟

帝之系在唐作虞正卿之後握此靈符彫雲布族祥星
結樞負茲大鏡未拾遺珠爰初發跡斬蛇鞠旅大定番
禹載戡海渚承釁而運席卷中流王室如燬乃合諸侯
負鐵誓衆釋位同謀俱登涿鹿實斷黃尤道濟一匡功
歸四履爰總百官訓於天子儻來有運事非獲已翠龜
負字赤雀銜書謳謔適夏禮樂遷虞負辰正位升壇受
圖二儀協序五緯同符門歌麟趾室詠騶虞奉常定日
太卜蠲時升中備物方告雍熙天甘玉露地秀金芝休
禎未答靈貺徒欺吏求穆卜詔絕良鑒義躔失御天街
褫蹕夏采升榮宮車晏出洞閨移凶克庭罷吉閑宵宵

之窮燈去昭昭之遊日歸大暮之不暘降幽宮而長畢
巫咸筮告容成戒期文衛如在葆鐸相悲去畢陌而東
顧望橋山而路遲臣攀龍而尚在魂過沛而何之侍低
昂之靈燾奉寂寂之空帷銅雀沒於脩松平陵隱於深
柏節鼓鼓之哀音燎燿火於通夕薤露落而暮日寒元
霜凝而壘草白銘功德於旂常被徽音於鍾石迴天儀
於清廟祔祖考而來格播茂實與英聲鬱氛氲於宗祏
徐陵文帝哀策文曰容車馳駕輓殿晨張旌帷具列
綽翻成行擗蜃輅於丹陛攀龍帷於紫庭趨過窮於屏
闈拜慟感於明靈東京飛其瑞露北陸實其祥星乃詔

雲臺之史稽採咸池之曲叶大雅於鳴金同藏書於羣
玉其辭曰若水傳帝薰風御民重光所集世載於陳赫
矣高祖悠哉上昊蟬聯寶胄暉煥郊裡我皇誕聖膺此
家慶道主衢躡神凝懸鏡洛書天表河紀靈命納揆馳
芳賓門流詠稽陰克伐震野勤王亳道增構幽風會昌
言瞻少昊實仗高陽駕彼軫轡清宮未央歡覃兆庶德
洎遐荒穆齊高寢上膳長樂肅肅承顏哀哀薦酌悼園
恭儉章陵謙約大寶崇名無聞改作纂武升歷遺愛實
繁三湘九派沴氣雲昏力折天柱才傾地門甘泉夜照
細柳朝屯谷魅山鬼橫流塞源赫赫英謨赴赴雄斷遍

行天討無遺神算鬱埽江淮長驅巴漢九夸百越雷隨
風渙北俘昆耶西戡伊韋荷負皇極劬勞庶幾勤民聽
政盱食宵衣服貴綈阜風移閭闔唐山罷奏濮水韜徽
訪採狂狷搜駁仄微世感中孚民維大畜外戶無閉高
垣奚築降情儒雅凝懷庠塾御廡爲歡臨雍彌肅禮兼
三代樂備九成天資武德地照文明墨履斯在幪巾自
清連珠合璧曜爽流精獸舞時豫禽歌頌平帝載維遠
王靈維大候雨占風荒中海外憬彼鞮譯咸承冠帶是
曰君臨斯爲交泰白環已賁元珪克禎東河佇指北狄
思征鉞斧將戒璵珞未鳴星淫去楚日沴悲荆億兆何

覺宮昊遠傾大禹胼胝重華踞腊仰惟勞務同斯違懌
發夢無徵照祈奚益聽茂陵之鐘鼓抱橋陽之劔烏詎
鬚歸於宸儀終纏綿於號擗三占以吉四海同奔列眉
天宇崩號帝闔千門啓於閭闔萬乘警於靈輶槐風悲
於輦道松雨思於郊原攀旂動而虛蹕宿衛靜而空尊
畢陌平夸流山蟠固紀無遷市唐有通樹經白社之脩
塗迴青門之廣路思沛邑以東臨懷周京以西顧機神
不測性道難稱充窮靡寄孺慕奚憑惟封云之與禪肅
遺玉牒之與金繩揚英聲而永久共日月而俱升江
總宣帝哀策文曰望蜃綽而攀標拜龍鼓而慟絕變五

統而淒涼迴三辰而慘切感川岳而地維傾號穹蒼而
天柱折千秋茂德萬世鴻名爰詔掌禮式序英聲其辭
曰媯水樞宿姚墟大虹謳歌承曆揖讓受終重規帝緒
踵武王風名山紀跡清廟傳功我后丕承思弘祖業莅
政恭已臨朝凝默煥爛九功葳蕤七德憲章昭著威靈
允塞爰茲發跡天步艱難連華滕衛比譽應韓羽儀戚
右軒冕朝端祈膺當璧繇大橫延喜授玉告善飛旌
神器有奉性道無名詩頌唐年樂舞姬日仁聲汪濊武
義洋溢理訟總街凝情衢室巡望如禮幽祇咸秩疆垂
叛援關徼虔劉治兵丹浦獲醜青丘屠釣且拔管庫方

搜如龍駕鼓獻雉焚裘天必呈祥地寧愛寶神禽奇獸
嘉穀靈草屈軼抽階飛黃伏皂綺雲舒慶珠星照老廣
敷丘索弘啓膠庠書林吐馥文囿含鏘南洽侯衛北暢
遐荒殷羅自解周圖無傷金英掩色玉牀弗豫天駟摧
鑣王良失御鑄鼎奚益綴衣何處漫漫幽夜冥冥上仙
長違拜日失意祈年寧神卜兆晏駕迴天銅麟感泣銀
海埋田出德陽之廣殿動繁笳之哀囀渡洛水之浮橋
望偃師之近縣背紫陌而未遠隱黃山而不見鐸啓挽
而依依馬嘶風而戀戀平原欲晦落照將垂鳳蓋飄而
水暗鸞蹕聳而山危曳蛇旗之舒卷間翠野之參差鳥

哀哀而驚曙松瑟瑟而吟枝異故鄉之絲竹非舊宅之
塤箎掃秋葉而無盡薦春櫻而願知北邙已謝西陵何
有遠宿蒼梧便乖仁壽聲合韶濩道宣戶牖共瀛海而
恒流並嵩華而莫朽 唐虞世南高祖哀策文曰遠
覽載籍渺聽皇王立德可久應運斯昌天基崇峻帝系
悠長虹耀降祉真氣呈祥蔥珩朱紱熊軾龍章契叶禎
符誕生叡聖彤雲晝聚黃星夕映舒卷潛躍幾深道性
地載天臨日暉川鏡歷試藩岳風移俗正火德云謝羣
龍戰野蚩尤曜旗王良策馬拔山噎日滔天泯夏蕩析
黎元跼危宗社提劍創業仗鉞專征風驅雲動海運天

行伐謀上略制勝神兵尊王踐土復帝夸庚職惟上相
任隆羣辟六階已平四門咸闢殊物顯命彝章典冊錫
重介珪禮優乘石煙雲改色鏞篔變音觀圖受命負宸
君臨仁霑動植化感飛沈殷輅周冕禹迹堯心削觚返
樸抵璧藏金商俗未改遺氛阻亂沙塞虔劉伊瀍叛換
應變雷動乘機電斷十角雲消三川冰泮漸以文教致
諸王道制禮和樂尊儒養老翠鳳栖桐丹魚在藻水浮
元貝階榮朱草威加海外澤被區中要荒合軌鞮譯遐
通沒羽沈浪飛輪駕風眷言釋負有懷高謝倏爾樂陽
杳同姑射趨詩禮以承天稟義方以成化聿膺景福方

期大年玉几奄及金滕遂騫絕五日之晨省遽千齡而
上仙攀帷扈以孺慕抱劒烏以纏綿曰聖與仁誰前誰
後炎昊無金石之固勳華異松喬之壽孰歷世而長存
惟令名之不朽矧元功與至德冠列辟而為首俾軼五
而登三與造化而長久 褚遂良太宗哀策文曰三微
固祉五耀垂文光昭司牧對越唐勳族著元牡家傳縉
雲高祖配天一人有慶大行神武維幾作聖良畫自得
高文成性夙表餘雄先懷友敬蒼兕爰發朱旗首令寰
瀛昏墊關洛荒蕪妖傾地軸盜弄乾樞戎衣先啓霸政
宏謨天兵電掃月陣風驅蚩尤遞剪獫狁咸誅閭位不

虞餘氛興戾先收秦組次焚商袂轉圓上略容光下濟
徒邑垂仁賓門洒惠脩風順軌凝圖奉睿青戾同規元
珠叶契發揮三五聲明遐裔泛野休兵靈臺偃革升巖
藏銃遵河奉璧學肆徐輪丘園散帛就日攸宜如天在
斯刑哀動植化美墳笮樂華曾舉禮葉旁垂沙塲罄翦
斗極咸羈狼山入囿潮海歸池東旌若木西旆條支龍
鄉委質烏衣來儀大矣乘時悠哉利見文龜浮沼應龍
在淀瀟露飛甘卿雲呈絢松萑望幸瑤華方薦仙舟劒
術星飛告變凝沴氣於升年掩璿暉於離殿崇基永煥
置業方昭遺風餘烈天長地遙想神襟而騰茂縱史筆

而揚翹籠嘉聲於日月終有裕於唐堯 又高宗哀策
文曰月瑤誕慶靈丘降祥仙源漢遠聖緒天長繞樞飛
電麗室騰光鳥庭開象龍德合章六藝生知四聰神授
晦迹登序韜光齒胄綴玉詞條緝瓊文囿發揮綠錯牢
籠紫宙鑑符敦敏量本疏通賓門表譽納麓彰功始潛
朱邸或躍青宮夏俞欽德周誦傾風粵自銅闈虔膺寶
命惠霑動植信泊翔泳淳化有敷至仁無競教溢璇寓
道光金鏡五龍開運六羽昇平西雲應呂南風散絃晷
符羲日蔭廣堯天賁園旌士焚林蓋賢濬明上格財成
下濟問寢承親在原申悌戒盈茅宇蠲奢土砌衢室裡

宗雲門饗帝以聖承聖資明嗣明禮崇殷夏樂盛咸英
時和俗泰天平地成永同文軌長垂頌聲德動乾符威
清地紀澄氛禳穴埽沴濛汜推轂六師坐知千里亭毒
寰縣瑩鏡圖史霜戟林聳月旗雲亘疊鼓簫關鳴笳松
磴追涼水殿避暑山楹霞翻浪井樹響層城務簡通三
神凝得一元池肆賞青丘佇逸訪道順風養真乘日拜
牧襄野尊師石室無事無爲爰遊爰豫骨域延想汾川
滌慮儀鳳巢阿飛麟在馭火林歸朔燭鄉移曙所冀元
壽齊年紫皇遽脫屣於宸極奄乘雲於帝鄉亘天維而
落構匝日寓而沈光恭惟聖烈實鏤微衷敬因彤管載

撰元功業彌遙而道彌著時益遠而聲益隆播二儀而
不極橫四海而焉窮 徐彥伯中宗哀策文曰少典之
子重華之孫珠聯寶系海浸昌源鳳鳥鳴國蛟龍守門
於鑠皇朕赫應成命青靄南浮彤雲北映埽刷中寓光
亨累聖欽若應天纘戎前慶身佩星斗掌提曦鏡克明
克類允武允文就之如日望之如雲聲中律呂辭含典
墳道懋登庸榮膺繼體位擁青陸業移朱邸春誦夏弦
冬詩秋禮鵬舉提象鸞飛鑿乾蘿圖已御芝壘仍傳拱
默當宁賡歌撫絃堯親更睦媯德逾羶萬寶阜成四門
光闕宵衣若厲道風猶尺野接翹車殿橫儒席潤洽泉

魚恩周卉毳鞮譯驚輪要荒走幣削觚反樸寬刑薄稅
俗富京坻人忘疵癘元精備典洪範盈疇將竦華蓋遙
封岱丘厭紫宙之阨僻追白雲之豫遊時若慕於喪妣
道空在於委裘 王縉明皇哀策文曰天厭隋亂中原
無主人歸唐德上帝是輔以聖易暴興文繼武義冠殷
湯威包漢祖仰膺歷數光宅區寓惟皇得一承乾嗣五
赫哉厥初萬物斯覩景龍之際乾儀反坤不利王室將
開禍門呂危劉氏趙啄皇孫我獨仗劔神武斯賁上排
閭闔俯埽軒轅不驚宗廟大造黎元為而不有禮備尊
尊乃奉睿宗爰受寶命問安視膳純孝至敬維城之年

佐路之政一著獻兆百靈翼聖躍馬絕流水不敢競潛
龍變海池亦呈慶有開必先興王之盛誥曰皇帝余倦
於勤往纘丕績以順兆人辭之不可其命維新體乾之
大法土之均臨之以日生之以春九族既睦四門既賓
天通之聖電斷之神求賢冀筮就列縉紳謹言是聽庶
政必親刑措兵弭威加德馴琛賚爭入來自無垠駕鼓
斥駿焚裘棄珍風雨時若京坻相因師於上古思與還
淳然後制禮節焉作樂和焉東祠后土南郊上元齋祭
陵廟位號山川教戰講武祈農籍田冕旒問俗旌旗幸
邊文物蔽地英聲動天鳳巢麟擾甘露醴泉九尾三脊

朱草飛煙繽紛効祉每歲且千道德洋溢乾坤交泰成
功如何登封於岱才藝餘美帝王之最樂究天人乙夜
慙對文齊日月秋風靡逮推曆正元調律平害札動雲
落弦開葉碎揮琴陋虞教歌輕沛良辰可賞聽政方退
鐘鼓屢陳君臣高會巍巍蕩蕩四十餘載巡省順動西
南輿區命子出震繼明握圖長驅猛士累翦封狐不失
舊物言旋上都離宮就養壽酒多娛習道久矣神仙遠
乎 裴士淹肅宗哀策文曰高丘演慶元牝開祥寶曆
攸重靈源自長文昭武穆累聖重光七葉增睿時惟我
皇伊昔休應虹流電驚猗蘭養德叢桂疏榮光含玉理

秀發珠衡辨日多悟朝雲更輕尊師樂業問寢揚名三
善克舉萬邦以貞叶契斷金觀書羣玉性與兼愛道存
濡足詢事考言登庸受錄運符提象輝同偶燭景星耀
芒大風成曲戎羯緣間書稱猾夏轉旆秦川連兵朔野
順時徙邑聿來岐下用翦脩蛇匪勤戎馬輯寧黎庶保
乂宗社赫矣天府於皇樂都瑤壇饗帝璧沼崇儒進善
求瘼明刑恤辜丹巖藏銑綠浦捐珠功宣祀夏道洽歌
虞物莫疵癘人用昭蘇樂陽先惠棣華增睦冠帶麟洲
賓延鳥服招諫懸鼓誓師推轂禮備樂和遠安邇肅恩
猶覆燾義涵亭毒露臺愛費茅宇蠲奢北薦春寶南收

若華卿雲聳蓋滴露垂葩
秀同穎階榮指邪滌慮高
居凝神下濟遠探仙訣
深入真諦穆穆頌聲温温愷悌
榮鍾三古牢籠八裔
令狐楚憲宗哀策文曰配天惟
唐伊祁同光應道爲帝元元之系
聖人有作孝子善繼
顯赫十朝總齊四裔執其大象
司彼左契武烈誕敷文
明下濟出潛離隱或躍未融
親則磐石封殊翦桐承桃
黃屋主營青宮禮樂盡在謳
謳薦至軒皇倦勤傳付神
器太母侍養親臨寶位怡聲
下色先意承志家令敢言
天子屏貴明明出震業業承
乾其仁如山其智如泉理
析堅白學探幽潛揮毫霧動
揆藻霞鮮所持者儉所寶

者賢刑靡不省賞無不延冕
旒迎日珪璧祈年涕謁宗
廟臣朝昊天天縱神聖日躋
孝敬鴻名再加寶曆一定
窮人屢賑名士交聘獸愛觸
邪草憐指佞梯航修貢鱗
羽遂性河色呈符山聲告慶
編書辨謗創殿思政甘節
必稱苦言終聽稜威之遠德
政之盛霜雪憲章雷風號
令夏臺齒劍上黨納奔趙際
宅心鄴中聽命誰能去兵
王者有征玉壘霧廓金陵鏡
清狐鳴上蔡蟻聚東平伏
鑽就戮迴戈受烹始以止殺
歸於好生恢恢不失蕩蕩
難名信及隱微道存溥博走
馬斯卻昆蟲咸若調其玉
燭徇以木鐸混同車書遠頒
正朔範金合土大興太學

清蹕鳴鑾將登高嶽四維既張五刃已藏蠻夸戎羌敢
不來王天下清淨朝廷樂康會冠劍以高宴戲魚龍於
廣場有巖有翼無怠無荒俗皆臻於壽域人自謂於羲
皇日出入兮安窮極雲飛揚兮無處所瑞方瞻乎鳳來
災忽聞於鶴語謂百年之可卜嗟九齡之不與當凝旒
而下臨奄脫屣以輕舉封人猶祝於南山帝子已號於
北渚神行無方乾健不息物皆被於聖澤人自迷於帝
力巍乎高代之行至矣動天之德後元壤以長存冠蒼
穹而罔極 宋韓琦仁宗哀策文曰惟宋受命與天無
疆藝祖以武底寧四方太宗以文萬邦 王真廟紹隆

赫然其光逮夫仁宗益熾而昌厥生之初上帝惟祐天
日之表振古未覩色出珪璋步巖龍虎其俾真人來綏
下土元良之建七鬯是主寢門之間惕若文武嗣訓之
循纂承丕緒左右獻言以蒙自處大運歸乾獨化陶甄
進良黜姦始章聖權其仁如天其度如淵其仁伊何得
之自然草秀而茁蟲飛而翔尚不忍傷况吾民焉惠澤
之霈滂洋幅員物無不滋四十二年猗如天兮化功則
全其度伊何注然莫際巨細必容默分誠僞臣在言職
不知諱忌時肆詆訐衆嫉狂易聖心怡然曰此忠義是
也吾從過焉何戾猗如淵兮是能致治明慎庶獄極於

哀矜惟法所在未嘗妄刑郡邑之吏責之詳平一失入
罪無階顯榮尊為天子以儉為貴崇尚清虛屏斥紛麗
向緣不懌輔臣入視殿幄蕭然茵衾故敝率用繒素了
無文綺眾曰驚嗟上曰何謂吾之受用素止如此是民
膏血烏敢妄費恭事天地孝承祖宗九見圓丘再祗合
宮大禘於廟親藉於東服器精備棗盛潔豐小次不御
秉圭顯顯何必戶曉民胥偃風取士之路務在至公十
二臨軒策之必躬雋髦盡得嚴穴幾空有將有相曰功
曰庸眇視三代吾其比崇北胡之強西夏之獍時欲跳
梁恣其貪嗜吾以威懷折其凶銳兩皆搖尾從我羈餌

百蠻梯航琛賁日至禮樂具修干戈不試夫惟立嗣天
下之基前世令王或牽以私事不前定濱於亂危我出
獨斷挺然不疑求賢於宗唯聖是知神器之重其傳有
歸廟社以安生靈以嬉迹其大公堯舜之為昔在人上
必有偏好或樂馳逐或喜征討或務宴游或專營造或
邇聲色或泥丹竈碁弈之工擊拂之妙有一於此下從
而效噫吾仁宗澹無所樂曰吾好者在勤政道日必盥
是惟先之紹聞時弄翰或隸或草壘帚之埽千奇萬巧
去冬之暮清燕之間再闢天閣詔呼從官親作飛白侍
臣縱觀心合造化生成筆端書幅踰百大均寵頒退坐

羣玉行觴盡歡嗚呼秦漢而下御邦子民莫越三紀纔
聞數君其間治亂以相駁否亨之不醇如仁宗享國之
久而始終太平今彼安敢望吾之清塵生而無窮者厚
載健而不息者高旻惟至仁盛德與高厚之俱隆今萬
世魏然而不泯

急 諡策齊謝朓明皇帝諡策文曰仰惟早棄萬邦聖列
方遠式遵帝世傳德鴻猷咸以為無名以化則言繁莫
宣其道有來斯應則影響庶圖其功所以永言配命寄
心宗極光昭令德允樹風聲伏惟合信四時齊光日月
創保大於登庸通機神於受命因時以惕藉九萬而輕

舉天保既定運四海而高臨及開物成務重維國紐風
行草偃化往如神左賢右戚內樂外禮輯五材以教民
由三驅而在宥用能盛德殷薦美善斯畢皇矣之業既
孚蒸哉之道咸備景化方遠厭世在天龜策告期遠日
無改仰則前王俯詢百辟累德稱睿允極鴻名 **增** 唐
權德輿德宗諡策文曰伏惟德合天地作人父母纂承
光明建用皇極服藝祖神宗之大烈有乾乾翼翼之至
敬敷佑迪哲尊嚴懿恭燭明四極發育萬物濯沐乎仁
澤澄清乎理本洎時有稔沴變生京穀省方展義弘陰
臨之功整旅致誅申震耀之令氛祲滅息侯王軌道不

冒持載鏡清砥平然後明禋祀萬靈以接翕受敷施
九德咸事含弘亭毒以致其和博采虛受以通其志政
刑有箴宸扆有銘煥乎文明之化成也因時創節象卦
設樂薰然中和之被物也去徽號而約已正廟祧而尊
祖九譯通道萬方來庭賓旅焯乎勲籍夷歌陳於樂府
霜露所墜車書大同順氣旁達天休滋至慶霄輪困德
水清澈三辰秉陽以宣耀百嘉麗地而交感飛走呈祥
肖翹遂性在宥天下二十有七年夫文思光被陶唐之
盛也慤怛忠利虞帝之教也疊疊穆穆周文之業也聰
明神武漢祖之烈也窮古先之大律極帝者之上儀方

將扈升介丘待檢玉牒奄遺天命永棄多方顧惟冲昧
懼忝孫謀君父有命付茲神器虔恭貽訓感慕滋深今
因山既建同軌畢至考稱天之禮稽節惠之法式遵古
義敢薦大名 李珣文宗謚策文曰德升上元功定內
難百辟勸進萬姓樂推洎順人推運嗣統立極凝旒建
大中之道執契弘無爲之化聰明天縱孝敬日新翼翼
承九廟之祭蒸蒸奉三宮之養以文思光赤縣以武德
澄滄海慈儉厚下端莊肅物達聰無不察難續若不知
成湯之六事罔憊大禹之九功咸序每宰臣伏奏卿士
宴見論道何啻於日旰恤刑已至於歲減大辟諫路深

排倖門危言激訐惟理是聽匪唯納之而又賞之密戚
貴寵惟法是訓匪唯戒之而又繩之禎符秘瑞王者之
所寶郡國承詔寢而不揚鴻名徽號列聖之所重臣寮
抗疏約而不受興起儒術脩明祀事刻經誥於琬琰真
宗廟之琮璜雞鳴而起孜孜於衆善日入而息矻矻於
羣書敦敘九族厚感藩之恩協和萬邦惇戎狄之信至
公不私於天性體道必從乎人欲應變懸解知機如神
日者數逢倣擾星有謫見克已脩德側身勵政和人心
以保乂謹天戒而來祥旌別淑慝澄清品流一物失所
必形於睟容百姓未康每勞於聖慮聽政餘力游藝緣

情探二南之風雅窮六義之教化汾水著韻柏梁變體
腴雋人口馨香國風至於出宮人放鷺鳥大官節重咏
之膳外府減任土之貢日月臨照天地含弘肖翹蠢蠕
樂生遂性稽帝王之能事鄙封禪之虛美超邁三五度
越聖賢繇是四夸八蠻罔不庭九州六合罔不順在宥
天下十有五年於戲身居九重心遍萬寓日用憂濟時
臻治平形悴神勞至於大漸夫謚者行之迹號者功之
表採鴻生鉅儒之議從公卿庶尹之請考彼古道易茲
大名對越昊穹式揚徽烈 元袁楠英宗謚策文曰伏
以瑤圖纘緒神已御於鼎湖玉冊揚休禮宜陞於太室

滄鏡卷四十三
悼降年之不永儼立政以如新爰述徽猷以傳信史欽
惟皇帝文明天縱剛健日嚴辨奸邪於嗣位之初彤庭
祇畏廣儀注於熙朝之際清廟肅雖絕封勅以杜儉人
申憲章以勵多士罰茲無赦令必惟行君臨三載而有
成知周萬物而莫隱豈運逢艱否大命靡終然號謹追
崇尊名是著伏惟炳靈有赫歆格無違祔於新宮以妥
以宜 劉廣睿宗謚策文曰伏以詣泰壇而請命有稱
天以誅之文薦清廟而致嚴蓋若昔相承之典剛辰爰
卜遺美載揚欽惟睿宗孝友溫恭聰明濟哲屬我家肇
造於朔土佐聖祖邁征於四方逮天討之奉行致皇威

之遠暢金源假兩河之息天水渝通好之盟遂移秦隴
之師粵有褒斜之舉既平南鄭順流而東再涉襄江自
天而下乃眷三峰之捷實開萬世之基唇既亡而齒則
寒號可伐而虞不臘適英文之違豫圖中夏之底寧毋
作神羞請以身代爰俟金滕之啓已知寶祚之歸迪我
後人紹茲明命徽稱顯號雖已擬諸形容玉檢金泥尚
未遑於潤色伏惟端臨宸座誕受鴻名億萬斯年永錫
繁祉 王構世祖謚策文曰臣聞繼志述事非篤孝無
以盡其誠表行誅功非定謚無以稱其實肆邦彝之具
舉維天道之協從欽惟先皇帝膺籙受圖體元立統蚤
帝王部

從藩邸茂著徽稱爲治之基有常經國之略則遠役用
衆智獨斷於衷總攬萬幾如指諸掌內朝廷外侯牧等
威迭降罔不適中先教化後刑名本末相循亦皆有序
在御迨踰於三紀推尊合冠於百王若夫惠及困窮恩
加降附慎終如始每存好仁之心保小以仁特示包荒
之量擴盛猷之鴻塗沛膏澤之醇醲方其泰運漸亨戢
濟多難離綱復綴混一四方傳檄而氛祲開渙號而方
維定乾旋坤轉不足以喻其機雷厲風飛不足以比其
捷至於嘉言博采惟典謨訓誥是師諸藝畢延盡陰陽
圖緯之學考音律以創字畫參古今以制禮儀振耀威

靈肅陳兵衛白旄黃鉞持則親巡犀甲雕弧止於不用
其聖德弗可及已神功茂以尚焉蓋文之所加者深武
之所服者大是用升崇吉祔揆卜剛辰伏惟睿靈俯垂
昭鑒思皇多祐錫羨無疆 張士觀成宗謚策文曰臣
聞稱天以誅表名實之至公法日而名庶形容之可擬
維帝王之有謚蓋今古之彝章欽惟皇帝稟上哲之資
撫重熙之運當裕考龍升之後承世皇燕翼之謀武威
肅鎮於遐荒文德誕敷於華夏業業謹盈成之戒愉愉
盡孝敬之誠罷勤遠之兵邊釁弭而苗頑格遣直指之
使皇澤宣而民瘼除九族形敦睦之風萬國洽隆平之

治爰酌奉常之義用昭告祔之文伏惟睿靈在天孚鑒
逮下茂膺典冊錫羨邦家 又仁宗謚策文曰臣聞觀
其謚而知其行著王者之不稱禋於廟而誅於郊實邦
家之彝典維天地之大莫能擬議而臣子之情宜極形
容爰體至公式揚景鑠欽惟皇帝聰明冠古勇智自天
初大德之陟遐生內釁於不測乃從潛邸獨運聖謨正
神器於幾危定乾維而重構豐功盛烈奮立一時偉望
英聲揚溢四海尋被武皇之歷試納於大麓以弗迷由
母弟之懿親膺元良之重寄取法裕廟主營之道隆奉
養東朝因心之孝至及嗣歷服益見猷爲月恒日升廓

昭代文明之治海涵春照推聖人博愛之仁至於敦勸
農桑不嗜田獵每覆奏於庶獄必惻怛於宸衷肇設制
科以待天下之士特旌死節以勵天下之忠臨御十年
始終一德身衛斯文而不倦人由其道而莫知克謹持
盈諒多遺美屬升崇於吉祔用祇薦於鴻名上以慰在
天之靈下以協造庭之請 虞集明宗謚策文曰臣聞
統必有宗生嘗得以致其讓廟必有主歿思所以尊其
名稽古考文宜先錫誅欽惟先皇帝夙秉勇智惟時元
良體傳次之成言避謳歌而逃出雖身居絕域多歷於
歲年而義動遠人樂爲之先後德威孔著未堪大業之

艱貞事變匪常猶閔生靈而慎動庶來蘇於僎戴爰戡
定以奉迎已謹清宮俄虛黃屋臣民寡祐永遺惠澤之
敷施天日有臨尚想神明之如在禮嚴升祔誠備顯揚
伏冀睿慈俯回歆假克綏丕祚垂裕無疆 明 關
太祖謚策文曰臣聞俊德贊堯重華美舜禹湯文武列
聖相承功德兼隆威膺顯號欽惟皇考統天肇運奮自
布衣禮樂文章垂憲萬世德合乾坤明同日月功超千
古道冠百王伏惟聖靈陟降陰騭下民覆燾無極與天
常存 又 關 撰 人 成祖謚策文曰臣聞聖神之德如天
地之化至妙莫測至大難名然皇有義軒之稱帝有堯

舜之號皆本謨烈表於萬年恭惟皇考體天之心弘天
之道具大而能化之聖存妙不可知之神統理萬邦仁
育庶類並乾坤之發育同日月之照臨廣大而高明剛
健而不息揚神武以靖亂宣文教以興治篤繼志述事
之孝兼創業守成之績典章之備集百王之成朝貢之
臻極八紘之遠道泰時康於茲二紀隆功盛德宜薦尊
稱伏惟聖靈在天昭明有赫垂裕後嗣咸被家國於萬
萬世與天無極 又 關 撰 人 仁宗謚策文曰臣聞名以
表實號以昭行惟古聖神道德之盛不可名言而伏羲
神農黃帝堯舜皆因治化之隆必崇顯大之號恭惟皇

考躬上聖之資蘊太和之德剛健中正廣大仁明久正
儲闡嗣履帝位欽若天道憲章祖宗誠孝通於神明皇
恩被於普率丕顯文化一新德政如陽春之施如日月
之行哀矜庶獄民用不犯敬脩武事不厲而威外順內
安邦以寧謐天下歸戴如慈父母聖德神化宜薦尊號
伏惟聖靈在天昭鑒於下佑我子孫爰暨黎庶億萬萬
年永隆洪祚

碑明宋訥歷代帝王廟碑曰兩儀判而人極立大統
建而君道明粵自上古神聖繼作代天理物以開萬世
太平之治故天地以之而位四時以之而序萬物以之

而育大經大本以之而立盛德相繼傳至於今欽惟聖
天子受天明命肇脩人紀以建民極續皇帝王之正統
衍億萬年之洪基稽古定制作廟京邑以祀歷代帝王
重一統也謹拜手稽首言曰維帝王功德於昭于天宜
有清廟以宅神展敬歷世以來祀典斯闕三皇五帝祭
於四類僅見於周而堯舜禹湯發迹肇基及所經歷之
地或有祠焉遣使致祭後世有之至於合廟京國歲脩
享禮古未之聞皇上定鼎江左治功既成神人洽和禮
樂明備凡朝祀之瀆禮不經謫祀非法者一切去之正
名定統肇自三皇繼功相比德相侔列像於庭金玉其

相袞冕焜煌聚精會神咸宅於茲每歲春秋二仲諏日
誓士上御宸極制命大臣齋明承祀邊豆靜嘉柔盛豐
潔告充告碩神格洋洋所以推惟本始式昭曠典者至
矣其三年則命官奉香幣詣陵寢具儀物以時致享又
以昭聖顯靈而示不忘也嗚呼天生民而立之君所以
靖亂也康濟天下阜成兆民而登之仁壽之域者皆以
奉若天道而已是故前乎三代之官天下者天也後乎
三代之家天下者亦天也皇帝王之繼作漢唐宋之迭
興以至於元皆然混一寰宇紹正大統以承天休而為
民極右之敘之不亦宜乎秦晉及隋視其功德不能無

媿故黜而不與是可見皇上敦名實重理道崇德報功
大公至正之心直足以度越百皇垂憲來世永永無斁
謹為銘曰惟皇作極克配天地丕昭盛化以正大位皇
道而皇帝道而帝歷夏商周三王迭繼熙熙皞皞同底
於治於赫漢祖寬而有制光武奮興炎靈用熾唐興晉
陽遂有神器太宗重光力行仁義明明有宋其德克類
暨於元氏而亦用又豐功茂德後先輝贊翼翼斯宮有
恤而闕貌像既嚴皇靈斯莅享祀必芬儀文孔備陟降
在庭神之攸暨祚我皇明以克永世
舜廟碑曰懷山不已龍門未闢大道御世天下為公感

夢長人明敬反陋釐降二女結友九男執耜歷山耕夫
所以讓畔施畧雷澤漁父於是讓川亦既登庸以之納
麓九宮咸事百揆時敘有大功於當世集歷數而在躬
受文祖之命致昭華之玉班五瑞於羣后禋六宗於上
元舞干戚而遠夸賓棄金璧而幽靈應青雲浮洛榮光
塞河符瑞必臻休祥咸萃以君人之大德為帝王之稱
首陟方之駕遂往蒼梧之室不歸爰自先民實存舊廟
既緝葺房遂鎮瑤席龍駕帝服蓋依稀於慕舜交鼓絙
瑟實騁騶於聞韶其辭曰虹氣降靈姚墟誕聖樹陰未
徙帝圖已定乃賓四門以齊七政天眷功高民歸德盛

治既蕩蕩化亦巍巍南風在詠西環有歸嶷山永逝湘
水長違靈宮肅肅神館微微 增元鄧文原禹廟碑曰
溯河之東有山鬱蒼鎮於南土夸視崇岡昔帝會同圭
璧斯皇翩其颺馭若帝陟方若彼橋山弓劍是藏維是
橫流潰潰懷襄燥川靜谷成賦定疆帝躬菲惡俾民樂
康鑄鼎象列謨訓範防功加九有道尊百王世嚴秩祀
登薦肅將牧臣有惕顧視榛荒乃堂乃構邃宇周墻吉
蠲來享雲旆龍章繫帝贊育時厥雨暘物消疵癘歲詠
茨梁永佑皇圖儲慶發祥即山勒銘德遠彌光 崔融
啓母廟碑曰窮聖神備道德滋萌元氣開闢太初此乃

法錄卷之四十一
天皇氏之所以應乎天也依土地明神靈駕六羽而上騰度九州而下濟斯乃人皇氏之所以應乎人也造書契教畋漁合五緯而節四時登九天而類萬物斯羲皇氏之所以制人法也務播植該變通嘗藥以救兆人聚貨而交天下斯神農氏之所以興人利也振夔鼓載龍旂天則元女授符帝則黃神降斗此則軒轅氏之所以除人害也原後漢班固高祖泗水亭碑曰皇皇炎漢兆自沛豐乾降著符精感赤龍承魁流裔襲唐末風寸木尺土無埃斯亭建號宣基維以沛公揚威斬蛇金精摧傷涉關凌灞受爵漢中勒兵陳東剗禽三秦陳張畫

策蕭勃翼終出爵褒賢列土封功炎火之德彌光以明源清流潔本盛末弘序將十八贊述股肱休勲顯祚永永無疆於皇舊亭留嗣是承天之福祐萬年是興 蔡邕光武濟陽宮碑曰王室中微哀平短祚姦臣王莽偷有神器十有八年罪盈惡熟天人致誅帝乃龍見白水淵躍昆蚩破前隊之衆殄二公之師收兵略地經營河朔於是羣公諸將據河洛之文協符瑞之徵僉曰歷數在帝踐阼允宜乃以建武元年六月即位于鄗縣之陽五成之陌祀漢配天罔失舊物享國三十有三年方內乂安蠻夸率服巡狩泰山禪梁父皇代之遐迹帝者之

上儀罔不畢舉道德餘慶延於無窮先民有言曰樂樂其所自生而禮不忘其本是以虞稱媯汭姬美周原皇天乃眷神宮實始於此厥路藐哉所謂神麗顯融越不可尚小臣河尹璋來在濟陽願見神宮追惟桑梓褒述之義用敢作頌其辭曰赫赫炎天爰曜其暉篤生聖皇貳漢之微稽度虔則誕育靈姿黃孽作慝篡握天機帝赫斯怒爰整其師應期潛見扶陽而飛禍亂克定羣兇殄夸匡復帝載萬國以綏巡於四岳展義省方登封降禪升於中皇爰茲初基天命孔彰子子孫孫保之無疆

增明陳經邦世宗神功聖德碑曰粵自生民以來歷

選羣辟統有全宇惟三五功德烺烺炳炳照竹帛而垂霄壤迄今可知已嗣是英君間作或以勲名顯或以德文著罕覩其兼即兼焉亦卑而鮮隆駁而寡粹竟不能與上世者方軌而馳則信乎聖王之難也惟天純祐我有明篤生神聖昌中興之運惟我世宗肅皇帝起自藩服應運握符恢帝緒拓皇圖緯經陰陽闔闢天地至道淵博駿烈紛綸即能言之士莫克躬稱殫述矣臣叨被眷遇侍陛戟贊帷幄日久竊伏覩帝之聖神天縱之中正純粹乃位天德仁明而武衆善備焉故其攬萬幾也事成於獨斷議定於立決鑒先朝之失凡厥積蠹宿

漢書卷四十三
三十五
弊為天下患者芟夸挾剔靡有遺伏睿謨坐制萬里北
顧而邊塵淨南伐而海波謐即孔稱魏乎之功書頌承
哉之烈不足多矣迺若宅心純穆典學緝熙左右陟降
參九元之上祁寒暑雨屬奧溲之下永年至孝實通神
明而敬一聖學直溯唐虞心法於數千載而與之冥契
由斯以談帝德則又磅礴乎兼容并包渾淪乎參天貳
地即諸書所稱曰廣運曰丕顯者何以加焉用是登我
道化保世滋大者四十五年於茲而遺聲餘烈將億萬
世是賴夏凌超絕振古耀今蓋自三五而降功德并茂
未有及我肅皇帝者也猗與盛哉臣不自量竊援古義

勉極模擬少述聖美於萬分之一謹拜手稽首作辭曰
天眷我明聖主乃生於戲世宗既聖既神鳳翔郢都龍
興漢水邇踐王猷遐追帝軌晉明出地乾健純天學包
伊洛理析幽元訐謨宏深睿思橫溢文武弛張神行莫
測先朝委柄下弄天綱世宗曰嗟亟正我邦大業在予
予敢不慎銳意中興登於嘉靖神凝治道恭默以思講
筵朝御書幄宵垂維敬維一聖學之基作箴自省于聖
是師孝大尊親禮嚴事父曠典肇新鴻儀聿舉慈宸上
仙經天悼慕迨彼純山六飛躬赴深知稼穡小人之依
大田歲籍方社時祈一精格帝五氣循期沴弭封滌和

苔濯枝幾務獨親威權由已賞不棄遐刑不阿邇如日
之照如風之行端居龍見淵嘿雷聲邊塵暫警羽檄孔
棘赫然一怒踪潛喙息蠢茲島夸毒我東南天戈一指
莫我敢當泮水陳俘我亭虛埃魚服橐弓虎皮卷冑台
階以正皇路以平上恬下熙時靡有爭凡此神功越此
聖德蕩蕩巍巍濯濯赫赫萬世承流首正仰則穹壤悠
悠視此貞石

淵鑑類函卷四十三

